



## Fasnacht 2022

### Joo, ych will !

Liebi Runzlebieger\*inne  
Mir hänn uns doo versammlet  
fir d Hochzyt vom Eddi und em Hamlet.  
Scho lang isch s häär, e mänggs Joor  
wo si sich droffe hänn am Daalbedoor.  
Homosexueli sinn deert scho lang legal,  
aaber das isch niemerem egal.  
Si wärde usspioniert und diskriminiert,  
drangsaliert, kontrolliert und regischtriert.  
Basel hett denn numme zwai Schwuli ghaa  
dr -minu und der Fredi Spiilmaa.  
Fir die andere hett sich kaine intressiert  
und vyyl isch im Versteggte bassiert.

Wobyy ych doo scho saage wott  
Au fir Maa und Frau gits e Verbott,

in dääre verglemme Zyt bis in d 80ger Joor  
isch Zämmewoone au fir Unverhyrooteti e  
Gfoor.

Gege Äändi Joorhundert wird s de Homos  
denn z bunt

Si feen aa demonschtriere und dien iire

Unmuet kund.

Gay Parade und Christophers Day,  
mr zelebriere uns, Hauptach gay  
In bunte Faarbe und schrille Verglaidige  
Dien si ir anderschst syy verdaidige.

Dr Hamlet goot zem Mammi hai  
Und sait, ych bi jetz nimm ellai,  
y haa my verliebt und miir wette zämme zie  
dass es dr Eddi isch, macht em Mammi scho  
Mie.

Und dr Bappe vom Eddi foot grad aa toobe  
Was hann ych falsch gmacht duet är sich  
frooge.

Y wird mi vor dr Frau Meier schämme  
Wenn das Rätschmuul euch gseet zämme.

Aaber alles Däubele nutzt nyt  
d Gsellschaft änderet sich mit dr Zyt.  
Wo die Zwai iiri Partnerschaft yydraage  
heersch iin stolz: „myyni zwai Buebe“ saage,  
und au s Mammi vom Hamlet isch guet draa,  
si hett jetz epper mit däm si Kaffiraamdeggeli  
sammle kaa.

No 7 Joor Kampf schaffts d Schwyz denne au  
D Ee z erlaube zwische Frau und Frau.

Liebi Runzlebieger\*inne  
Mir hänn uns doo versammlet

Um d Ee z schliesse vom Eddi und em Hamlet.

Hamlet: Willsch du dr Eddi nää ze dym Maa,  
joo, ych will

Eddi: Willsch du dr Hamlet nää ze dym Maa,  
jää, ych will

Somit sinn iir Ma und Ma vor eurem Gwüsse  
Und ir deerfet d Brut jetz küsse.

Liebi Runzlebieger\*inne

Wänn iir wiider pfyffe, ruesse und lache  
Und alli zämme Fasnacht mache?

Denn waart ych jetz uff euri Antwort ganz still  
(alli zämme): Joo, ych will!